

PAOT TE TĪMŌN PU TAPPET KAX'ĀMI I

1 ¹Ūgmūn Paot. 'Āte xa' kax'āmi nūhū tappet. Topa te mōgkutnāhā xix Yeyox Kunnix te', tu Yeyox Kunnix yōg mō'pok xop kopak xix. Topa te yūmūg kuxa kummuk xit, nūy kuxa max mō'tat, 'ūyānān tu'. Yūmū'āte max hip, yā Yeyox Kunnix hip. ²'Āte xa' kax'āmi', yā Tīmōn pu', yā 'āmūn yā 'ūgkutok pit putuk, yā Topa yōg putat max kopah yūmūg mōg. 'Āteput, puyīy Topa xix yūmūg xuxyā Yeyox Kunnix xa hāpxopmā max, nūy 'ākuxa ka', xayīy 'ākuxa yūm.

Tik te hāpkummuk yūmmūgāhā'

³Hōmā yūmūg mōg hāpxexka Māxenōn tu', tu 'āte 'āxak, xayīy hāpxopmā'. Ha ta hōnhā 'āte xe 'āxak nō'ōm. 'Āpu nox xihip kōmēn 'Ep tu'. 'Ōnte' pip nōm te hāpkummuk yūmmūgāhā'. 'Āpu' xat, pu hāpkummuk yūmmūgā kux, ⁴nūy hām'āktux hitop hā mō'āmā kux, nūy mōnāyxop hittap 'āxet'ax xohix xexka kax'āmi hok. Nōm te hām'āktux hā kaxīy, tu' kax'āmi, puxix tikmū'ūn kuxa mām 'ohnāg. Pa Topa tep-tup, pu tikmū'ūn kuxa mām ka'ok nōynā' mōg Topa yōg putat max kopah. ⁵Putep mūn putup Topa xik-mūn? Yā' kuxa tup te tikmū'ūn putup pax, tu' kuxa max te tikmū'ūn putup pax, tu' kuxa mām xe'e, nūy nōy putup pax. ⁶Pa yāg xop te nō putat max xaxok, tu yāy xaxok hām'āktux hitop kopah. ⁷Nōm tep-tup, nūy Mōyyex yōg xat'ax yūmmūgā', pa yāy yōg hām'āktux yūmmūg 'ohnāg, xix Mōyyex yōg xat'ax yūmmūg 'ohnāg, pa hām'āktux punethok.

⁸Yūmū'āte' yūmmūg, yā' max Mōyyex yōg xat'ax, pa xat'ax yūmmūgā kummuk, tu xat'ax mīy kummuk, yā' kummuk. ⁹Hamūn, tikmū'ūn te hāpkummuk mīy, yīy ta Topa te hāpkummuk mīy xop pu yāy yōg xat'ax popmāhā'. Hāpkummuk mīy xop te 'ūxat'ax mīy 'ohnāg, tu 'īpkox pip 'ohnāg, tu Topap-tup nōg pax, tu hāpkummuk mīy xohix pax, tu' kuxa kummuk te Topa yūmmūg 'ohnāg, tu yāy tak kix pax, tu yāy tut kix pax, tu tikmū'ūn xohix kix pax. ¹⁰Tu' nōy hā' xupxet pax, tu pit tix yāy mūtik nōm kummuk xix hex tix, tu' xupxet pax, tu' koit pax, tu hām'āktux xex koxyōy pax, tu hāpxop nōy kummuk xohix mīy, tu hāmyūmmūg xe'e 'āktux kummuk. ¹¹Yā hāmyūmmūg xe'e!, yā Topa yōg hām'āpak max. Topa 'ūmax xe'ēgnāg, tu 'ā' hāmyūmmūg hōm, 'ūyīy hām'āktux.

Topa max te yûmûg kuxa ka'

¹²Yeyox Kunnix yã yûmûg xuxyã, tuk ka'ogãhã!, 'üyÿy Topa pu hãpxopmã max. Yeyox kuxa yûm 'ügkopah, hu mögkutnãhã, 'üyÿy Topa pu hãpxopmã max, yã 'ãte Yeyox pu hãm'ãktux, hu: "Amax." Kaxÿy. ¹³Pa hõmã 'ãte Yeyox 'ãktux kummuk, tu Kunnix kopa kuxa mãm xop kute'ex kummuk, yã Yeyox kute'ex kummuk, tu Yeyox tuk gãy. Pa Topa tek pãnãhã!, tuk kuxa ka!, 'ügkuxa yûm 'ohnãg tu!, yã 'ãte yãy yõg hãpxopmã'ax yûmmûg 'ohnãg. ¹⁴Tu yûmûg xuxyã Yeyox te 'ã hãpxopmã max, tu 'ã' popmãhã mö'yãy xe'ëgnãg'ax xik kuxa yûm'ax. Nõm hãpxop xohix popmãhã, hak kuxa yûm Yeyox Kunnix kopah. ¹⁵Ta nû hãm'ãktux xe'e!, ha tikmû'ûn te hãm'ãktux paha!, tu' kuxa mãm hãm'ãktux kopah. Hãm'ãktux te kaxÿy: Yeyox Kunnix te hãm xexka tu' nûn tu nûktu' xupep, nÿy kummuk xop kuxa kummuk xit, nÿy nõ' nõy yãnãn, tu' kuxa max tat, ha tak mûn kummuk xexka nãm. Kaxÿy. ¹⁶Ûgmûn kummuk xexka nãm, ha Yeyox Kunnix te yõg kummuk miy'ax hã' tot mökuma!, pu tikmû'ûn pãnã!, nÿy hãm'yûmmûg. Yã nõm te' kuxa mãm putup Yeyox Kunnix kopah, yã nõm hi xe'ëgnãg mökuma'mõg, ha' kux 'ohnãg, yã nõm te hãm'yûmmûg putup. Hã kaxÿy Topa tek pãnãhã!, tuk kuxa ka!. ¹⁷Ûmax Topah, tu' xexka! 'Ûyõg hãm'yãxatamuk xohix xexkah. 'Ûyõg hãm'yãxatamuk mãxap 'ohnãg, 'ap nã'ah. Nõm te mãxap tu' xip Topah. 'Ap tut xip'ah, xix' yõg hãm'yãxatamuk nõg putup'ah, yã' xok putup'ah. Topa yãy xat 'ohnãg. Topap-xet, yã' nõy xip'ah, ha' nõy te nõm putuk'ah. 'Äpu Topa xexka miy nõynã mög, xix 'äkuxa kopa Topa xexka miy nõynã mög hãm'yãxatamuk kux 'ohnãg mökuma!. Hamûn.

¹⁸Timõn xõnnẽ!, hõmã Topa pupi hãm'ãktux xop te 'ãmûn 'ãktux, yÿy ta 'ãte 'ãxat hã kaxÿy kamah. 'Äpu Topa pupi hãm'ãktux xop yõg hãm'ãktux xaxok hok. Hã kaxÿy xate' xut putup, tu Topa pu hãpxopmã max putup. ¹⁹'Äpu 'äkuxa yûm mökuma!, nÿy 'äkuxa max. Tikmû'ûn 'ûm yÿpkox 'ohnãg, tu möktu yãy yõg kuxa mãm'ax koxyõy. ²⁰Ha yã kaxÿy miy 'Ïmënẽm xix 'Anexãn, ha 'ãte Hãmgãyãgnãg pu nõm popmãhã!, pu nõm pu hãm'yûmmûgã!, puyÿy Topa 'ãktux kummuk hok.

Topa pu hãm'ãktux

2 ¹'Äte xa hãm'ãktux putup. 'Äpu nû hãpxop miy hãmãxap. 'Äpu Topa pu hãm'ãktux, nÿy tikmû'ûn xohix pu hãpxop xax, nÿy hãpxop pop tikmû'ûn xohix pu! 'Äpu Topa pu hãm'ãktux, hu: "Tikmû'ûn xohix pu 'ãmax. Xate tikmû'ûn xohix pu hãpxop popmãhã!. Puxi!. 'Amax." Kaxÿy. ²'Äpu Topa pu tikmû'ûn 'ãktux hã kaxÿy, xix Topa pu xat'ax xohix xop 'ãktux, xix Topa pu xexkanãg xohix xop 'ãktux, puyÿy tikmû'ûn kuxa mãm, puyÿy tikmû'ûn yãy kix hok, puyÿy 'üyõg hãpxopmã'ax te Topa yõg putuk, nÿy hãpxop max miy. ³Ûmax, Topa pu tikmû'ûn 'ãktux, ha Topa tep-tup pax. Tute yûmûg kuxa kummuk xit, nÿy nõ' nõy yãnãn, tu yûmûg kuxa max mö'tat. ⁴Topa tep-tup, nÿy tikmû'ûn xohix xexka kuxa kummuk xit, nÿy nõy yãnãn, tu' kuxa max mö'tat, nÿy hãpxe'e yûmmûg. ⁵'Ûxip Topap-xet. Ha Topa te tikmû'ûn mütik

yây nîm. Ha ta' nøy puxet xip, yã Yeyox Kunnix, yã tihik, tu nôm te' nøy ta' yây tu' mōxa ha' mām. ⁶Yeyox te' yây mûn hōm, tu' xok, nüy Topa pu tikmû'ûn xohix popmã', ha mōktu xohix te' yûmmûg, Topa tep-tup, nüy kuxa kummuk xit, nüy nøy yãnãn, tu' kuxa max mō'tat. ⁷Ha Topa te Yeyox yōg mō'pok xop kopak xix, tu mōgkutnãhã', 'üyiy Yoneo kûnãpa pip xop pu hãmyûmmûgã', nüy kuxa mãm 'ãktux, xix hãpxe'e 'ãktux. 'Áte' koit'ah, yã hãpxe'e 'ãktux.

⁸'Áte'p-tup, pu hãm xexka yōg tik max xohix te Topa pu hãm'ãktux, nüy pepi' yîm tigã, nüy gãy hok, nüy yây mãnōg hok.

⁹'Áte'p-tup kamah, puyiy 'ûn hãmp'e'paxex max, nüy yây pu topixxax max pop, yã' xax yã tikmû'ûn max tep-tup. Yây xax mō'tat, pa' xax max xe'ëgnãg pe'paxex hok, pu tu tikmû'ûn xax max xe'ëgnãg pe'paxex hok. 'Ûmax, pu 'ûn yây xe pahix xexka hok. 'Ûmax, pu 'ûn pipkup yãnãm xop xohix ta hok, xix xap max xohix ta hok, xix xax te takat xexka tat hok. ¹⁰Pa' max, pu' kuxa max mō'tat, nüy hãpxopmã max, yã Topa kopa kuxa mãm xop yōg 'ûn max putuk. ¹¹'Ûmax, pu 'ûn hãmyûmmûg nōynã' mōg, pa hãm'ãktux kutōgnãg, xix yây kutōgnãg pe'paxex. ¹²'Áte' xat'ah, pu 'ûn tik pu hãmyûmmûgã', pu 'ûn tik xat, yã' max'ah. 'Ûmax, pu 'ûn hãm'ãktux kutōgnãg. ¹³Hamûn, Topa te 'Anão miy hãmãxap, tuknãy tu 'Ema miy. ¹⁴'Anão te koit kopa kuxa yûm 'ohnãg, pa 'Ema te koit kopa kuxa yûm, tu Topa yōg xat'ax koxyōy. ¹⁵'Ûmax, pu 'ûn kuxa mãm ka'ok mōkuma', xix' nøy mō'yây xe'ëgnãg mōkuma', xix hãmyok miy mōkuma', xix yây kutōgnãg pe'paxex, xik-tok pop. Topa te nôm hãpkummuk miy'ax kopa xupepmãp-tup.

Kunnix kopa kuxa mãm xop yōg pãnã'ax xexka'

3 ¹Hãm'ãktux xe'e nühü', tik 'ûm tep-tup, nüy yãyhã Kunnix kopa kuxa mãm xop yōg pãnã'ax xexka', yã' max, yã hãpxopmã max. ²'Ûmax, pu Kunnix kopa kuxa mãm xop yōg pãnã'ax xexka xohix hã kaxiy, yã hãpkummuk miy 'ohnãg, tu' xetut puxet, tu' gãy 'ohnãg, tup-tox max, ha tikmû'ûn te nôm pe'paxex max. Nôm te puknōg xop pu hãpxōn pax, tu tikmû'ûn pu hãmyûmmûgã max, ³tu 'ap paptux'ah, tu yây kix pax 'ohnãg, pa' pax yîmûg tãmñãg, tu tikmû'ûn mãnōg 'ohnãg, tu tayûmak putup pax 'ohnãg, ⁴tu' yây kutok xat max, xix xetut xat max, hak-tok yîpkox pip, tu' tak 'ãpagnãm. ⁵Pa tik 'ûm tek-tok xat kummuk xix xetut xat kummuk. 'Ok nôm te Kunnix kopa kuxa mãm xop pãnãp-tup max? 'Ãmhok. ⁶'Ûmax, Kunnix kopa kuxa mãm xop yōg pãnã'ax xexka te Topa yōg putat kopa' xip hãmyãxatamuk xohix hã, 'a' tup'ah Topa yōg putat kopah. 'Ûtup, tu yãyhã xexka', puxix yây xexka pe'paxex putup, yã Hãmgãyãgnãg putuk, tu Topa tep-tup nōg putup. ⁷'Ûmax, pu Kunnix kopa kuxa mãm xop kûnãpa pip xop nôm tik 'ãpagnãm, puyiy Kunnix kopa kuxa mãm xop nôm tik hãhup putup'ah, puyiy Hãmgãyãgnãg nôm tik pa hok.

Kunnix kopa kuxa mãm xop yōg nôm te hok xop pu hãpxop popmãhã'

⁸Ha ta' max kamah, pu hãpxopmã max Kunnix kopa kuxa mãm xop yōg nôm te hok xop pu hãpxop popmãhã', tup-tox max, tu 'ap te kexmuk xo'op xet'ah, tu

xupkumîy 'ohnâg, ⁹tu Topa yõg putat yõg hãmyũmmũg tu' pip ka'ok, tu' kuxa tup. ¹⁰Ûmax, pu tikmũ'ũn nõm tik yõg hãpxopmã'ax kopit hãmãxap. 'Ûmax, puxix hãm putup Kunnix kopa kuxa mãm xop pu', ¹¹ha ta' max, pu' xetut kuxa max kamah, tu' nõy hã xũmãhîy 'ohnâg, tu' paptux 'ohnâg, tu' koit 'ohnâg. ¹²Ûmax pu' xetut puxet xip, tu' xat max 'ûxetut xik-tok, puyîy yîpkox pip. ¹³Ûhãm max, puxix tikmũ'ũn nõm 'ãpak, ha nõm te Topa yõg putat yõg hãmyũmmũg 'ãktux max putup, tu' mõg Topa yõg putat kopa Yeyox Kunnix mütik.

Topa yõg hãmyũmmũg

¹⁴Ta 'ãte xa nũ' tappet kax'ãmi', tup-tup, nũy mõg hãpxip kutõgnãg 'ihã, nũy 'ãxop pãnã'. ¹⁵Kak xip ka'ok nũnte, puxix nũ' tappet xa hãpxopmã'ax yũmmũgãp-tup Kunnix kopa kuxa mãm xop yõg hãpxopmã'ax. Topa hi xe'e, ha Kunnix kopa kuxa mãm xop te hãpxe'e yũmmũg. ¹⁶Hãmyũmmũg yok xe'ẽgnãg yũmũ yõg Topa yõg putat kopah, ha Topa te yũmũg pãnãnã' xip hã kaxîy:

“Yeyox nũn, tu nũktu' nãhã' tu tikmũ'ũn putuk, ha Topa Koxuk te yũmũ'ã hãmyũmmũgãhã', Yeyox yã' xe'e', ha pexkox yõg nũ'pok xop te' pãnãhã',

ha tikmũ'ũn te Yeyox yõg hãm'ãpak max 'ãktux hãpxexka xohix tu', ha hãpxexka xohix tu xohix te Yeyox kopa' kuxa mãm, ha ta Topa te Yeyox mõgãhã pexkox tu'.”

Kaxîy.

Tik te tikmũ'ũn pu hãpkohe yũmmũgãp-tup

4 ¹Topa Koxuk tek mũ'ã' yũmmũgãhã hak mũ'ãte' xupak max. 'Ûyũmmũgãhã hã kaxîy: Hãm xexka yõg hãmyãxatamuk xohix xox putox 'ihã tikmũ'ũn yãg te Topa yõg putat max kopa' mõg, tu' xak putup, nũy Hãmgãyãgnãg yõg xop te koit xupax, nũy yãmîy xop yõg hãxopmã'ax yũmmũg, nũy mîy. ²Ha nõm tik te nõm hãpxopmã'ax yũmmũg, tu' nõy pu nõm hãpxop yũmmũgãp-tup. Tik te' koit, tu' kuxa kummuk, tu tikmũ'ũn pu hãpkohe yũmmũgãhã'. ³Nõm tik kummuk te' yũmmũgãhã hã kaxîy: “Ûmax'ah yãytaha, yã yãyta hok, xix xit'ax yãg mã hok,” Kaxîy. Pa Topa te' xit'ax mîy, pu tikmũ'ũn mã'. Topa tep-tup, pu kuxa mãm hãmyok yũmmũg xop te Topa pu hãm'ãktux hãmãxap, nũy Topa pu: “Yã 'ãmax. 'Ûxit'ax max. Puxi!” Kaxîy. Tuk-nãy tu' mãhã'. ⁴Topa te hãpxop xohix mîy, ha hãpxop xohix yã' max. 'Àpu hãmp'e'paxeh hok, yã hãpxop 'ũm kummuk. 'Àpu hãpxop xohix pop, nũy Topa pu hãm'ãktux, hu: “'ãmax. Hãpxop max. Puxi!” Kaxîy. ⁵Topa yõg hãm'ãktux xip, ha tikmũ'ũn te Topa pu hãm'ãktux, puxix Topa pu hãpxop xohix 'ũmax.

Yeyox Kunnix yõg kãmãnat max

⁶Àpu Kunnix kopa kuxa mãm xop pu' yũmmũgã nõ'õm. 'Ûyũmmũgã', nũy ta 'ãmũn yã Yeyox Kunnix yõg kãmãnat max. Pu yũmmũgã nũy Topa yõg hãm'ãktux

'ākoxuk hã pa', yã 'ākoxuk te Topa yōg hãm'āktux mähã putuk, yã' xit'ax putuk. Topa yōg hãm'āktux te' yümmügähã 'ākuxa yüm xix hãpxopmã yok. 'Āmōg nōm putat max kopah. ⁷Āpu nōm hãm'āktux nōy pa hok, yã Topa yōg'ah, yã hãm'āktux hitop. 'Āpu hãpxopmã', xayīy yãy koxuk ka'ogã', nūy Topa putuk. ⁸Hãpxopmã', nūy yãy yin ka'ogã', yã' max, pa hãpxopmã', nūy yãy koxuk maxnã', yã' max xe'e'. Yã 'ākoxuk xip nūnte, xix hãm nōy tu' xip putup kamah, pa 'āyīn xok putup. ⁹Āpu 'ūpa nū hãm'āktux xe'e'. 'Āpu 'ākuxa yüm nū hãm'āktux tu'. ¹⁰Topa xip, tu tikmũ'ün xohix kuxa kummuk xit, nūy kuxa max mō'tat, 'üyānān tu', tu' kuxa mām ka'ok xop kuxa kummuk xit punethok. Topa xip, yīy ta yümũ'āte hāmmax hip, hu yümũ'āte hãpxopmã max punethok, tu yümũ'āte hãpkummuk hãg tot.

¹¹'Āpu 'ūxat nūhũ', nūy nōm yümmügã'. ¹²'Āmūn tuktup, pa tux hok, pu tikmũ'ün hãm'āktux hok, 'āxexka'ah. 'Āpu hãpxopmã max, ha' nōy te' pēnähã', tu kama' mīy 'āmūn putuk, tu 'ōg hãm'āktux 'āpak, tu kama' hãm'āktux 'āmūn putuk. 'Āpu tikmũ'ün putup pax, ha' nōy te' tikmũ'ün putup pax putup kamah, tu 'ākuxa yüm pēnähã', tu' kuxa mām kamah, tu 'ōg hãpxopmã yok pēnähã', tu kama' mīy. ¹³'Āpu hãpxopmã max punethok mãyōn mōg tox hã, ha mōktu xa tuk xupep. 'Āpu Topa yōg tappet mō'kupix, puyīy tikmũ'ün xohix xexka' xupax. 'Āpu Topa 'āktux, nūy yümmügã'.

¹⁴Ta hōmã Topa Koxuk te 'āka'ogähã', xayīy Topa pu hãpxopmã' max, yã Topa pupi hãm'āktux xop te hãm'āktux, 'īhã tik te Kunnix kopa kuxa mām xop pēnã max xop te 'āyīmüg yüm xex. 'Āpu nōm hãpxopmã mōkuma mōg. ¹⁵'Āpu nōm hãpxop xohix mīynām ha tikmũ'ün te 'ōg hãpxopmã max nōynã' mōg pēnãp-tup. ¹⁶'Āpu 'ōg hãpxopmã'ax kopit, xix 'ōg hāmyümmüg kopit. 'Āpu nōm hãpxopmã mōkuma 'āmōg. Nōm hãpxopmã mōkuma 'āmōg, nūy ta hãpkummuk mīy'ax hã yãy xatat, ha ta' nōm te' xupak xop hãpkummuk mīy'ax nīm putup.

Tīmōn xix Kunnix kopa kuxa mām xop

5 ¹'Āpu tik kutut xop mănōg hok, pa nōm tu 'ākax, 'ūk-tok te' tak tu' kax putuk. 'Āpu tik tuktup xop tu 'ākax 'ātaknōy putuk. ²'Āpu 'ün kutut xop mănōg hok, pa nōm tu 'ākax, 'ūk-tok te' tut tu' kax putuk. 'Āpu 'ūhex tuktup xop tu 'ākax 'āhex putuk. 'Āpu hãpxopmã yok.

³'Āpu 'ün hok mām xop hã 'ātehet nōm xuxyã xop ti 'ohnãg. ⁴Pa xuxyã xop 'āti 'ün hok mām xop yōg, puxi' max, pu xuxyã xop hok mām xop pēnã'. Hã kaxīy kutok te yãy pix xinnähã 'ūtut pu', xi' tak pu'. Topa tep-tup. ⁵Ha ta 'ün hok mām xop pip, ha xuxyã ti 'ohnãg, nōm kuxa mām ka'ok Topa kopah, tu Topa yōg hãpxop max hip, tu Topa pu hãm'āktux mōkuma' mōg, tu Topa yōg hãpxop xohix xak 'āmnīy 'īhã xix hãptup 'īhã'. ⁶Pa 'ün hok mām xop nōy te hãpkute'ex pax. 'Ūxip, pa xakix xop putuk.

⁷'Āpu nū' xat, puyīy tu nōy mănōg hok yã yãy kix hok. ⁸Xuxyã 'üm te' xape pēnã 'ohnãg, puxix Topa yōg putat max xak. Yã' kuxa mām 'ohnãg xop 'ükummuk, pa nōm kummuk xexka nãm.

⁹Ta hok yūm 'ūm hām putup Kunnix kopa kuxa mām xop pu'. Yā' max, pu yōg hāmyāxatamuk 60 tuhomi' mōg, tu yāytap-xet, tu yīpxox nīm 'ohnāg, ¹⁰tu hāpxopmā max, yā tikmū'ūn te' yūmmūg, tuk-tok hā' tep max, tu puknōg xop hā' tehe' yāy pet tu', tu Kunnix kopa kuxa mām xop pata pix, tu hāpkummuk pip xop hā tehe'. Yā nōm hok yūm hām putup Kunnix kopa kuxa mām xop pu'.

¹¹Pa tux hok, pu hok mām xop kutut 'ohnāg xop Kunnix kopa kuxa mām xop pu' hām hok. Hāpxip 'ihā yāytap-tup xūy, tu Kunnix nīm putup. ¹²Yā' kummuk Topa pu'. Yā Kunnix pu hām'āktux xex, pa' koxyōy. ¹³Tu hāpkumep pax, tu' hām 'ohnāg yā tuknōgnāg, tu xūmāhiygā pax, tu' nōy xop yōg hāpxop kute'ex pax, tu hāpxop xaptop 'āktux. ¹⁴Yā' max, pu nōm yāytax, nūy tuk-tok pop, nūy yīnmūn pēnā max, ha mōktu Kunnix kopa kuxa mām xop kūnāpa pip xop hām'āktux kummuk mīy hok. ¹⁵Hamūn, hōmā 'ūn hok mām xop yāgnāg te Topa yōg putat max xak, nūy Hāmgyāgnāg pe mōg. ¹⁶Ha ta 'ūn 'ūm xip, tu Topa kopa kuxa yūm ka'ok, tu' yōg yīnmūn xop kopa' xip hok yūm. 'Ūmax, pu nōm hok yūm hā tu tehet, 'ap Kunnix kopa kuxa mām xop te'ah. Yā Kunnix kopa kuxa mām xop te 'ūn hok mām xop hā tutep-tup, nōm xuxyā pip 'ohnāg.

¹⁷Ta tik te Kunnix kopa kuxa mām xop pēnā max'ax xop kopa' pip, tu' hām max. Tute hāpxopmā max, tu' nōy mōgā max. 'Āpu nōm hā pago tix. Yā hamūn, nōm hām ka'ok, nūy nōy pu Topa 'āktux, nūy nōy pu hāmyūmmūgā'. 'Āpu nōm hā pago max xe'le'. ¹⁸Yā hamūn, Topa tappet te hām'āktux, hu: "Mūnūytut tak xexka yīkox mō'yīnnīn hok, nōm te mītkup hepmāhā'." Kaxīy. Tu xe: "Āpu kāmānat max tu pago max." Kaxīy. ¹⁹Nōm puxet 'ūm te nōm tik 'ūm 'āktux, hu: "Yā 'ōm te hāpkummuk mīy." Kaxīy. 'Āpu nōm 'āpax hok. Pa nōm tix pe tikoxyuk 'ūm te nōm tik 'ūm 'āktux, hu: "Yā 'ōm te hāpkummuk mīy." Kaxīy. 'Āpu nōm 'āpax. ²⁰'Āpu nōm te hāpkummuk mīy mānōg, puyīy tikmū'ūn xohix xupax, puyīy kuxānōg.

²¹Topa te' xupak, xix Yeyox Kunnix te' xupak xix pexkox yōg nū'pok xop te' xupak. Yā Topa te nōm yīmōgātux pexkox yōg nū'pok xop. 'Āpu yōg hām'āktux 'āpax, nūy mīy. 'Āpu xohix yāy putuk, nūy yāy hā tu tehet. ²²Nāy, mōg pu'uk, nūy 'ūnōy putox yīmū 'āyīm xeh, nūy nōm ka'ogā', puyīy Topa pu hāpxopmā max. Ta 'āpu' nōy hā 'āte hok, puyīy hāpkummuk mīy hok. 'Āpu hāmyok mīy.

²³'Āpakut 'āhiynāg. 'Āpu kōnāg xo'op, xix xupyāg kutōgnāg xo'op, nūy 'ātex hā 'ātehet.

²⁴Xate tik yāg yōg hāpkummuk mīy'ax pēnā mō'ka'ok, ha tikmū'ūn te kama' pēnāhā', Topa te' kummuk hā' nōy yānān putup. Pa tik yāg nōy yōg hāpkummuk mīy'ax xaptop, pa hāpxip 'ihā' pēnāp-tup, hāpxip 'ihā' kummuk hā' nōy yānān putup. ²⁵Hā kaxīy kama xate' nōy yōg hāpxopmā max pēnā mō'ka'ok, tu ta' nōy yōg hāpxopmā max pēnāk-tōgnāg, pa hāpxip 'ihā' pēnāp-tup. 'Ap xaptop'ah.

6 ¹'Āte xa hām'āktux nūhū: 'ūhok hām'ax xop, 'āpu 'āxuxyā 'āpax, puyīy tikmū'ūn Topa 'āktux kummuk hok, xix yūmū yōg hāmyūmmūg 'āktux kummuk hok. ²'Ūhok hām'ax 'ūm xix xuxyā te Kunnix kopa kuxa mām xop kopa' tihi'. 'Ūhok hām'ax, 'āpu 'āxuxyā 'āpax. 'Āpu hām'āktux hok hu: "Hamūn 'ūktaknōy putuk. 'Āte nōm 'āpak

putup'ah.” Kaxiy. 'Äpu nõm pu hãm max, xayiy 'äxuxyã pu hãpxopmã max, yã' xip Kunnix kopa kuxa mãm xop kopah. Yã nõm hok hãm'ax tep-tup pax Kunnix kopa kuxa mãm xop. 'Äpu tikmũ'ün pu nõ hãpxop yümmügã'.

'Ûptexop xexka'

³Ta nõm 'üm te tikmũ'ün pu hãpxopmã'ax nõy yümmügãhã', yã yümüg xuxyã Yeyox Kunnix yög hãpxopmã'ax putuk'ah, xix yümü yög putuk'ah. ⁴Hamün te yã mün xexka pe'paxex, pa hãmyümmüg 'ohnäg. Yã nõm te yã mãnög putup xüy, tu hãm'äktux hitop, tu yã mãnög putup pax. Ha hãpxip 'ihã tikmũ'ün te' nõy yïpkumiy putup, tu tikmũ'ün xop tu mõ'yây pot putup, tu yã mãnög putup, tu' nõy kopa kuxa mãm putup'ah, ⁵tup-tox kummuk xop te yã mãnög putup, tu' kuxa kopa hãpxe'e 'üm xip'ah, tup-tup, nüy yãyhã 'üp-texop xexka nõynã' mög Topa yög putat kopah. Yã' hãmp'e'paxex kummuk. ⁶Hamün, Topa te tikmũ'ün putexopmã xexka Topa yög putat kopah. Texiy 'üp-texop xexka'? Yã nõm te hãmp'e'paxex, hu: “Puxi! 'Äte hãpxop nõy 'üm putup'ah.” Kaxiy. Hã kaxiy 'üp-texop xexka'. ⁷Hamün, yümüg xakux, 'ihã putep paxnün hãm xexka tu'? Yã hãm 'ohnäg. Ta yümüg xakix putup, tu hãm xexka nım putup, 'ihã putep paxmög'ax? Yã hãm 'ohnäg. ⁸'Ûpip yümü yög xit'ax xix topixxax, puxi! ⁹Pa nõm 'üm tep-tup, nüy tup-texop xexka', yã nõm te hãpkummuk miy'ax yümüg putup. Nõm te hãpxop xohix hitop putup, xix hãpxop kummuk tu hãpxop kummuk miy'ax hã yã koxyöy putup, tu möktu mõ'pip, pamäg kopa mõ'pip putuk. ¹⁰Tayümak putup xüy'ax te tikmũ'ün mögãhã hãpkummuk miy'ax xohix tu! 'Ûyäg xop te Topa yög putat max xak, nüy tayümak pop, tu möktu' kuxa hittup 'ohnäg.

'Äpu hã kaxiy miy

¹¹Timõn, 'ãmün yã Topa yög tihik. 'Äpu nõ kaxiy hok. 'Äpu hãpxopmã yok, nüy Topa putuk, nüy 'äkuxa yüm, nüy nõy putup pax, nüy hãpxop xohix hã tot, nüy 'ägãy 'ohnäg. ¹²'Ämög Topa yög putat max kopah, yã' kuxa mãm'ax yög putat kopah. 'Äpu mõ'ka'ok, nüy hi xe'ëgnäg mökuma mög ha' kux 'ohnäg. Hömã Topa te 'ãxãnhã', xa Topa yög putat hã mög, yiy xate tikmũ'ün xohix keppa 'äkuxa yüm'ax 'äktux, ¹³tu Topa keppa nõm 'äktux kamah. Yã Topa te' yõnnã'i hĩnnãhã'. Xate Yeyox Kunnix keppa nõm 'äktux kamah. Yã hãmã Yeyox te Põn Pinat keppa hãm'äktux max kamah. 'Äte 'äxat, ¹⁴'äpu 'äyïpkox pi!, nüy miy mökuma mög, ha möktu yümüg xuxyã Yeyox Kunnix te putpu' nü! Yã yümüg xuxyã Yeyox Kunnix yög häptup xe'e 'ihã' nü! ¹⁵Nõm häptup xe'e 'ihã Topa te Yeyox nü'kutnãp-tup. Topa 'ümax, yã' xexkap-xet, 'ap nõy xip'ah, yã gohet yög xat'ax xi' xuxyã xop yög xuxyã'. ¹⁶Topap-xet 'ap nã'ah. 'Ap tut xip'ah, 'ütut te' put'ah. Hãmã xip'ah hãpxop xohix, pa Topa mün xip. Topa xok putup'ah, tu' yög hãmãxatamuk xohix mõ'kupix 'ohnäg. Yõnnã'i xohix xexka hã kaxiy'ah. Küyãnãm te Topa xakot, ha tikmũ'ün te Topa tu mõxap-tup'ah. Tikmũ'ün te Topa pẽnã 'ohnäg, tu pẽnãp-tup'ah. 'Äpu, Topa te xexka nõynã' mög 'äkuxa kopah. 'Ûyög hãpxop xohix xexka ka'ok, yã Topa yög hãmãxatamuk xohix kux 'ohnäg hã. Hamün.

¹⁷'Āpu, 'ūp-texop xexka xop xat, pu yāy xexka pe tu paxeh hok, puyīy yōg hāpxop punethok kopa kuxa mām hok. Yā hāpxop punethok 'a' pip ka'ok'ah. 'Āpu 'ūp-texop xexka xop xat, pu Topa kopa kuxa mām. Yā Topa mūn xip ka'ok. Yā Topa te yūmū'ā hāpxop xohix popmāhā' 'ūyīy yūmū kuxa tu hittup. ¹⁸'Āpu 'ūp-texop xexka xop xat, pu hāpxopmā max, yā hāpxopmā max hā tahix, nūy hok nīm pax, nūy popmā yāy yōg hāpxop. ¹⁹Hā kaxīy nōm te yōg hāpxopmā max'ax xex putup pexkox kopa Topa yīka hāmyāxatamuk nōy pu', tu hāpxop nōy pop putup kamah, yā hi xe'egnāg mōkuma'mōg, ha' kux 'ohnāg.

²⁰Tīmōn, 'āte 'āxat punethok. 'Āpu nōm hāpxopmā'. 'Āpu hām'āktux hitop 'āpax hok xix hāmyūmmūg kummuk 'āpax hok. Yā tikmū'ūn te' xuxet'ax mīy, tu: “Hāmyūmmūg.” Kaxīy. Pa yā' koit, yā hāmyūmmūg kummuk. ²¹Ha tikmū'ūn yāg te nōm hāmyūmmūg kummuk xak, tu Topa yōg putat max xak. 'Ātep-tup, pu Topa hāpxopmā'ax max 'āxop xohix pu'.

Tu ta tu' kux.